

են սպանել: Ասենք, այդպէս... Հիմա, եթէ սրանց հարցնես, թէ ի՞նչ է պատճառը այդ սպանութեան, զբանք կ'ասեն՝ մութ փողոցը, սրածայր դանակը: Իսկ մարդը, նրա հոգեբանութիւնը, ժառանգական ազդակները, սէրը, նախանձը, մի խօսքով, նրա ենթագիտակցութեան տակ ծփող անտեսանելի կեանքը, անտես են անում: Իրենց համար ամէն բան սոսկալիօրէն պարզ է: Միշտ հանդիստ ծովի մէջ են լողում... Երանելի՛ մարդիկ:

Գ-ն երկարօրէն ըմպում է իր կոնեակի բաժակը, ոտքերը երկարում սեղանի տակ եւ մտածում:

Գ-ն բարկացել է: Կանգ առած ինքնաշարժի մեքենան շարունակում է դժբաժնալ: Փրփուրը բերանին պաշտպանում է իր դեկավարած պետական թատրոնը: Կատակում են, զրգուում են, Գ-ն աւելի է զայրանում: Վ-ի ձեռքին բաժակը սկսում է դողալ: Աղօտ լոյսի տակ դէմքերը կարմիր են եւ փայլուն:

— Հայ լինելը, ընկերներ, — ասում է Չ-ն, — մեծ բեռ է: Հայ լինելը ճակատագիր է: Մըտածեցէք... որտեղից ենք դալիս... մտածեցէք, ի՞նչ սոսկալի ճանապարհ ենք անցել:

Բոռնցքը խփում է սեղանին:

— Հայ լինելը, — ասում եմ ես, — դաժան բան է, պայքար է, զոհարբութիւն է: Մենք ընկերներ ունէինք, մենք բարեկամներ, մայր, հայր, եղբայր ունէինք, ո՞ւր են, ո՞ւր են...

— Ընկեր Ձ, — պոռում է մէկը, — Խորհրդային Հայաստանում տիտը երգեր արգիլուած է երգել: Ձեզ կը յանձնենք ժողովրդական դատարանին...

Ձ-ն տաքացել եւ յուզուել է:

— Ժողովրդական դատարան, իսկ պատմութեան դատարանը մոռացե՞լ էք... մոռացե՞լ էք...

Ձայները խոռնում են: Ամենքը պոռում են: Էլ ոչինչ չի հասկացում:

Սերգէյը սկսել է երգել՝ վատ նշան: Երբ նա սկսում է երգել, ուրեմն կոխ պիտի լինի: Պատուհանի ետեւ երկիւնքը արթնանում է: Լուսաբացի դէմ, Արարատը, հսկայ եւ պայծառ, լուսաւորում է աշխարհը:

Դուրս եմ դալիս: Թարմ օդը դէմքս շոյում

է: Գնում եմ, անցնում եմ լուռ փողոցները, իջնում դէպի Չանդու:

Գնա՛մ, այդպէս գնամ...
* * *

Լուսաբացին՝ Արարատեան դաշտի բազուկները բարձրանում են դէպի երկինք: Լեռներից վար իջնող, պաղ, համայնատարած մի լուռութիւն մեղմօրէն զրկում է ինձ: Օրը առաջանում է, թեւերը կամաց շարժելով, եւ զգոյ՛ թառում է տժգոյն բոցերի խարոյկի վրայ:

Ի՞նչ լաւ սպրումի վայրկեան է: Ճակատիս վրայ անհունը եղեամ է դրել: Ինձ մինակ չեմ զգում: Մտիս տրոփումը անյայտ հեռուներից է դալիս: Մտածումներս՝ դաշտի մակերեսից, լեռների բարձունքներին են իջնում: Հողիս՝ լայն բացել է իր աչքերը, սքանչացած մի անդորրութիւն է: Մարդկանց աւելորդ շարժումները, տների տձեւ գունաւորումները, պատահական ձայների շեշտը, ամէն մի աւելորդ բան՝ բնութեան այս արթնացող, լուսաւոր ծովի մէջ՝ հերկում եւ կորչում է:

Հեռում, Արարատը՝ ալ կրակ ճառագայթների պտտող ճախարակի հետ՝ կարկանուտ է վսեմ իր դադաթը: Թւում է, հսկայ մի երգեհոնի, բամբ ձայների ալիքներ են մազբլցում դէպի երկինք, — ու ամէն ինչ, խոր լուռութեան մէջ մտիկ է անում:

Գեղամայ լեռները, ոսկէ փողերը երկարած, ամպերին յարթական քայլերդներ են ասում, մինչ փօքը Մասիսը, տիտում է իր բուրվառի արծաթ կրակը մինչեւ Արագած:

Լա՛ւ է, թաղուել այդպէս վերածնող կենդանութեան մէջ: Լինել պայծառութիւն, անդորր տարածութեան սրտիւն շունչ, եւ նոր սպրումի հրավառ շրթներից ընդունել խորհրդաւոր այս մասունքը:

Մենք ամենքս, պատերը շօշափելով առաջացող կոյրերի նման, փնտրում ենք մեր հոգին:

Քաղաքների դռների առջեւ կանգ ենք առնում մտատանջ: Խայթող ցաւերին՝ դէմ ենք դնում թոյլ մեր կրծքերը: Կեանքը որսում է մեզ, մենք որսում ենք կեանքին: Մահայն, մենք, վշտաբեռ անցորդներս, մանուկների եւ մեծ դաշտանկարների առջեւ, միացնում ենք մեր ձեռքերի ափերը եւ մի քիչ լոյս առնում: